

է, թէ երեխայութիւնից այդտեղ է ապրել միշտ եւ ամենաչնչին փոփոխութիւն իսկ չէ գտնում կատարների տեսքի մէջ: Միւս ուղեկից-ահանատեսներն եւս հաստատում են այդ: Աղէտի ժամանակ Ակոսիում գտնուած մի ջուրղ եւս յետագային (չին Բայազիտում) նոյնն է պատմել Վազներին, երբ սա Տաճկա-Հայաստան է այցելած եղել (1844 թ.), այն կողմից եւս Մասիս բարձրանալու նպատակով:

Այդ ամէնը Վազներ մանրամասնորէն յիշատակում է մանաւանդ այն պատճառով, որ դէպքի լաւագոյն աղբիւրների՝ ականատես անհատների վկայութեամբ ապացուցանի, որ 1840-ի բնական պատահարը երկրաբանականներքին պատճառների եւ ոչ թէ Մասիսի կատարից վրած զանգուածների արդիւնք է: Եթէ վերջինս տեղի ունեցած լինէր իսկապէս, անկարելի է որ լերան մէկ կամ միւս կատարի արտաքին տեսքը որոշ փոփոխութեան ենթարկուած չլինէր:

Մասիսի ժայթքումը 1840-ին՝ Վազներ մեծապէս տարբերում է գործող հրաբուխների երեւոյթներից առհասարակ: Ներկայ դէպքում ոչ հրեղէն սիւներ են երեւացել, ոչ էլ հրահոսուն զանգուած (լաւա): Այն ամէնը, ինչ որ դուրս է ժայթքել, եղել է կարծր (հող, քար) եւ ոչ երբեք հրահոսուն վիճակում:

Վազներ հազիւ մօտ 7000 ոտք բարձրանում է, աւելի՛ ոչ: Մինչեւ լերան կատարը բարձրանալու փորձը, ասում է ինքը, այնուամենայնիւ պիտի կատարէր, հակառակ դժուարութիւններին եւ ձեան շատութեան, եթէ օգաչափական գործիքները կորցրած չլինէր, առանց որոնց գիտական արժէք չպիտի ունենար Արարատի կատարը բարձրանալը:

Վազներ համոզուած է, որ անգամ տարուան այդ եղենակին (մայիսի վերջ) անկարելի չպիտի լինէր բարձրանալը, եթէ միայն մարդ երկու ցուրտ գիշերներ ձիւների վրայ անց կացնելու վախը չունենայ: Մեր ճամբորդը իր կողմից ըստ ամենայնի լրիւ ու ճշգրիտ է համարում Պարրոտի հաղորդած տեղեկութիւնները: Եւ նա միանգամայն վրդովւում է, թէ ինչպէս ոմանք, նախանձից դրդուած, կասկածի տակ են դնում այն փաստը, թէ Պարրոտն է եղել այդ «ճշմարտասէր ու վաս-

տակարժան գիտնականը», առաջին անգամ Արարատի գագաթը բարձրացողը, եւ որ՝ նա լիովին արժանի է այդ փառքին:

Արարատի ամենացած սառնարանները, ըստ Վազների, սկսում են 9-10 հազար ոտք բարձրութեան վրայ: Ինչպէս լերան կենդանական աշխարհը, այնպէս նաեւ բուսականութիւնը աղքատ է: Անտառների պակասը բացատրում է ոչ թէ կլիմայով ու հողով, այլ՝ պատմական պայմաններով:

Արարատի լանջից իջնելով՝ Վազներ յուլիսի սկզբին (1844) բարձրանում է Արագածի գագաթը: Բայց նախ քան այդ, մի քանի խօսք էլ այն մասին, թէ գերման հեղինակը ի՛նչ է ասում իր մի երկրորդ փորձի մասին՝ այս անգամ Մասիս բարձրանալու շին Բայազետի կողմից:

Բանն այն է, որ Վազներ Ռուսահայաստան այցելելուց մի տարի յետոյ, 1844-ի ամառը, Բերլինի Գիտութեանց Կաճառի նպատակով ձեռնարկում է մի ճամբորդութեան դէպի Տաճկա-Հայաստան, Արարատը հարաւային՝ մինչ այն դեռ բոլորովին անծանօթ՝ կողմից ուսումնասիրելու համար:

* * *

Յունիս 17-ին (1844) նա էրզրումից Բայազետ է մեկնում առեւտրական մի քարվանի հետ:

Շատ ցաւել պէտք է, որ Վազներ գրեթէ ոչ մի տեղեկութիւն չէ հաղորդում երկրի ազգաբանակութեան եւ նրա կենցաղի մասին: Ըստ երեւոյթին նա բոլորովին տարուած է եղել բնավատմական հետազննութիւններով եւ ժամանակ կամ յարմարութիւն չէ ունեցել որիչ խնդիրներով զբաղուելու:

Երեսուն ժամուան ճանապարհ հեռուից արդէն երեւում է Արարատը այդ կողմից, ասում է Վազներ. թէ՛ լերան տեսքը այդ կողմից շատ աւելի հոյակապ է քան Երեւանի կողմից, քան՝ մինչեւ իսկ Ս. Յակոբի մօտից: Թուրքա-կալէից տեսարանը աւելի է բացուում: Նոյն այդ տեղից հարաւում երեւում է Սիսիանը՝ իր արծաթափայլ գագաթով:

Ճամբորդները անցնում են Գիատինով, հասնում Բայազետ, ուղին շարունակում մինչեւ Մասիսի լանջերը:

Վազներ ասում է, թէ երբ իրենց քարվա-